

12 JUL 2002

DR MAHATHIR AKAN SAMPAI SUMBANGAN KEPADA ANAK PESAWAH KEDAH

ALOR SETAR, 12 Julai (Bernama) -- Perdana Menteri Datuk Seri Dr Mahathir Mohamad akan menyampaikan sumbangan Dana Pendidikan Anak-anak Pesawah Padiberas Nasional Berhad (BERNAS) kepada anak-anak pesawah yang cemerlang dalam pendidikan di Sungai Baru dekat sini, Isnin ini.

Seramai 150 orang anak pesawah di kawasan Dewan Undangan Negeri (DUN) Anak Bukit itu yang lulus cemerlang dalam peperiksaan Ujian Penilaian Sekolah Rendah (UPSR) dan Peperiksaan Menengah Rendah (PMR) tahun lalu masing-masing akan menerima RM600 dan RM700 seorang.

Seramai 150 lagi pelajar tingkatan tiga dan tingkatan lima akan menerima basikal, kata Ketua Bahagian Pentadbiran dan Sumber Manusia BERNAS Zainuri Kurmain berkata kepada Bernama, hari ini.

Setiap penerima sumbangan itu turut diberi perlindungan insurans kemalangan bernilai RM10,000 untuk tempoh setahun.

Beliau berkata sumbangan itu adalah khusus untuk anak-anak pesawah yang tidak mendapat biasiswa dan ibu bapa mereka berdaftar dengan persatuan penanam padi yang diiktiraf.

Dana Pendidikan BERNAS dilancarkan Dr Mahathir pada 2000 dengan peruntukan RM2 juta khusus bagi membantu anak-anak pesawah yang cemerlang dalam pelajaran dari sekolah rendah hingga tamat pengajian di universiti.

Sehingga kini, 362 orang diberi bantuan kewangan itu.

-- BERNAMA

ZA NAK